



倪小野先生全集

長樂鄧振鐸西
請并書

七世孫 繼宗 編

國子監
大德
甲申

七言古詩

寄沈黃門文明

昔日長安風雪晨
斗酒寒敘東西隣
一朝聚散遍海內
長年半改當時人
君獨飄飄歸去來
吳淞江水桃花新
小蓬明月閒往返
蘭芷入賦秋江濱
我慙吏事動如棘
欲往從之成因循
此時尚想吳門賢
同舟長

逝遊無垠

一作此時空想吳門舟賀張清興起風塵

贈徐徵君南峰

乃兄世昭號青峰光祿寺少卿

七言古詩

青峰南峰才相擬青峰五十始應舉名魁一省動春
闈天下文章共推許出入文華移彩筆塗抹雲霞飾
寰宇南峰今年五十來偃蹇轉奮欲超距自是君家
多晚成少年輕進何足數辟如松經萬年霜合補廟
堂雙棟柱雙材並用分所宜豈容遺一蔽林卉龍泉
離合自有時延平一旦生風雨

雲山圖

狂風送雨出西嶺樹頭渺渺波濤生雨陣東去天際
沒白雲片片山腰橫斜日含暉相掩映白雲踪跡還
無定簷隙茅疎日落光書窻自覺塵譁靜謾誦秋水

復高眠忽聽松梢飛暗泉手拋書卷聊有得門前已
報剡溪船

舟中睡起

小舟如瓮篷窻低白晝臥到日沉西覺來欠伸推篷
起蒲風刮刮吹江水仰看青天繁星明我欲數之不
知名光輝溢日疎且朗七星如斗天北橫

題畫

我疑畫史意多幻偶觀茲畫殊逼真昔我行觀四明
山重崖疊嶂何嶙峋青雲泉落成碧■茅茨雜竹綠
溪濱其中亦有好事者琴軒幽雅延詩人此境迥異

畫難傳始知此畫筆入神溪邊山人若比我我入四
明烏紗巾君攜歸去常挂壁百年僚友如相鄰

石庵爲長洲大覺寺僧賦

莽薄蒙密雲煙叢松根草帶蟠如龍鬼神呵護嚴且
雄虎熊遠避無行踪文殊錫杖飛羣峰卓處疑有神
仙宮赤手剜開混沌封峻嶒磅礴含虛空塵寰無處
容其躬四大坐此無不容上缺一點天光通下竅直
徹滄溟東牽蘿栖補雲關重別有日月明玲瓏昨訪
王母過闌風白鶴使者青猿公不爲我守遊崆峒回
途迷沒桃花紅遙看衲挂岩頭松呼猿叫鶴聲如鐘

從此不出禪心融華山頂上千年夢

雲岩贈張千兵廷鎮

崔嵬半落山腰懸獨立俯見松頂泉石底雲根變態
生倚日帶雨爭奇妍玲瓏月色雪千嶺掩映花光霞
一川龍虎陣裏雄意態銀光鎖甲生風煙青虬騰駕
不可禦乾坤際會誰爭先蒼生久望夢中霖眼前物
色名時賢功成退斂殊閒雅靜觀四景岩頭眠白衣
蒼狗斯須閒萬古一日惟青天

茗溪沈君以采詩過太倉有贈

茗溪有客清且苦平生志願惟好古奔走三吳采風

謠不問華門與蓬戶偶然渴我婁江濟芒鞋未脫半
塵土語言樸野禮貌疎腰項無態媚官府背負一囊
詩一部三吳豪傑肺肝吐珠璣磊砢照目光云是此
客手親組三吳大雅傳二京格韻中和薄秦楚欲叩
知音忙向人收名定價歸李杜我好古俗務羈詩
書釋手箭脫弩茗溪之客善談詩喚我吟魂破昏魯
案牘縱橫正惱懷嘲弄風月公餘補茶餅傾倒火爐
溫坐久譙樓過二鼓殘月倚海風入簾雪花點點如
可數忽聞雙鶴鳴東塢何當便起中宵舞

贈夏松月

跨塘橋邊正思君跨塘橋下雨水分伊吾櫓聲出浦
口羣鷗驚起飛白雲我知君棹便高喚君夢初破醒
宿醺相逢拍手各大笑茶鐺倚膝烟氤氳悠悠十里
婁河路婁城臺閣挂斜曛闔門沽酒動清酌鼎頭錯
出羅五葷更深不厭廢膏燭話久愛我詞氣芬繁絲
弱管隔江聽百杯何必煩紅裙一聲野笛清思發冰
雪澆我胸中焚衆賓欲臥我未臥明日萬事仍紛紜
石峰書屋爲慈谿馮教正賦

石刺山峰鬱嵯峨石刺山下白雲多草堂中開待高
隱松檜日長冰霜柯一泉寒滴洗硯沼九峰翠合藏

書阿何時攜手笑歸去慈湖短棹頻相過

醉書瑞光寺僧畫竹

鳳凰飛來明月下玉簫吹處風盈把翠魂飄去不可尋但見瀟湘碧流瀉誰人描此挂山軒六月彷彿霜風打

半閒爲姑蘇館人賦

半閒先生住城市市聲喧耳眠未起牀頭春酒杏花香雲蒸霞鬱斗室裏舉頭長吸春江水卯後一醉重蒙被醒來午日當簷停却喜堂下羅孫子漫呼孫子整杖履小步市橋嬾梳洗相逢醉處如兄弟小園雨霽摘春薺海棠池館日斜時山色蒼蒼水瀾瀾嗟嗟先生心自閒未能山居而野處市童爭呼半閒仙始笑多忙不知止

題遺安卷

塵心喚醒思鹿門歸去欲問鹿門君春風幾度杏蒲雨柴門倚看苗如雲塍頭高樹有鳴鳩樹下兼有白鷺羣攜書坐愛午陰薄就餉甘此薤韭葦老妻稚兒相牽呼欣然從我之耕耘回頭試語妻兒計年年稼穡惟辛勤農家有業莫外慕龐公遺安我素聞

贈李元壽

一刻贈
李仁山

拙牧有客清且奇論詩之處每稱之因之發我美人
思新洋江月梅花時扁舟往返無停期此意難語竟
睽離忽然訪我婁江湄感子殷勤訂我詩我詩花葉
隨風吹落泥逐水點破籬娟媯可愛風日姿情景偶
與幽人宜斬藤披蔓掇其枝我詩就編錦繡摛思牧
堂前雨如絲翠柏石岡綠竹埤岡麓方池水瀾瀾燭
光夜鎖青苧帷煮茗對酌清詩脾眼前不見者是誰
拙牧廬中高睡癡

茅君求贈沈氏

茅君謁我到滄州館人沈老相延畱黃雞一筍雨窗

山青蒲細切香醪浮燈前高酌俱忘愁茅君感此稱
未休更敘此老行詣優壯年丹穴鸞亡儔孤栖霜月
梧桐秋有琴不彈心悠悠花草亂發迷林丘嗟嗟薄
倖無家遊黃金博得桑閒羞垂老悲吟空白頭嗟嗟
此老吾所褒觀風有使來諸侯

別龔秀才持憲

滄州昨膏朝天車慙慙贈我皆圖書眼底忽訝龔生
無江雨夜過崑山墟海日弄影江林疎忽聞龔生氣
嘻噓角巾折雨行沮洳手持一幅明璠璣云到遊涇
先待予待予不到真躊躇嗟嗟此意今始舒別駕筵

開斜日餘罇有酒兮盤有魚相逢一醉愁破除殘夜
明月照闔閭欲聯長句弔子胥思君不見情轉紆別
後過訪拙牧廬爲問此意竟何如

舟過崑山適陸秋谷捧部檄至

黃梅江上晴復雨萬里畫鷁停雙櫓篙工疑帶潞河
音問之乃是秋谷至

一刻秋谷正待秋風生

蘇門美酒別駕筵

邀之共酌日過午世途艱難未暇論綠楊搖杯歌白
苧遙捧部檄招滄州爲我彈冠醉中舞此意慙慙無
以贈蹇裳試采芳洲杜

古松行

我生卽見此松老千尺嵯峨十圍抱古根盤石透龍
泉直幹撐雲當鳥道月浮江水翠欲流風落塵寰淨
如掃倒挂天邊雙劍秋遠涵月色萬家曉山下書屋
相對開絕憐雨後涼颼來淒切笙簧出林壑分明圖
畫臨樓臺天地有心付正氣廟堂大手需良材仰看
光輝孕琥珀忽訝景色移徂徠一去長安經歲月落
日坐對西山雪迢遙瞻望極鄉關慷慨詩歌比貞烈
清高猶記子陵亭變化愁空神禹穴歸來試問松閒
翁春風幾度生薇蕨

題菊

淵明一去千百載何人更繼風流踪南山佳興入庭
戶黃花采采閒西風味菜子孫兼愛菊爲托丹青寫
清淑霜前芳草凋繁青露下幽篁長新綠七十餘種
次第開種種殊異超風埃霞臉初回妃子笑雪翎驚
墮仙禽胎錦繡袍明圍玉帶水晶盤小擎金杯園林
富貴誰與擬丰采相對蓮花臺最宜晚色倚斜日疎
影亭亭落苔石清渠掩映水繞流淡烟塗抹月初出
美人只在天之涯湘江南北皆秋花汀蘭岸芷同芳
馨品題俱入騷人家陶情屈恨何可言令我執筆心
茫然醜醜竟度寂寥境悵懍長悲遲暮年古人寄情

諒非物莫以醒醉分愚賢聖朝文章跨楚晉爲君聊
賦黃花篇

古意

暮秋紅樹豔于錦詩思萬斛傾不窮主人高興不尋
常勸我美酒千百鍾醉餘繁絲動清奏翠幕風飄出
紅袖芳菲桃李照青春燦爛雲霞移白晝歌譜新翻
清更奇宮妝宮樣巧相關翡翠冠高桂枝斜芙蓉裙
展蘭香透桃根桃葉是何人昔人遺恨迷風塵相逢
無淚墮青衫明月髣髴秋江濱鷓鴣入曲轉可哀蝴
蝶隨夢疑非眞金徽誰託此情幽玉珮遙贈相知新

盡態極妍各自逞其中有一婉且靜朱脣欲作樊素
容翠眉半蹙西施病未言更覺麗情多獨立共訝淡
妝靚整衣出席漫徘徊一曲相思竦清聽聽之如瀉
當年情寵辱一旦悲不平紅羅纏頭動高價彩筆贈
賦馳清聲幸看車騎爭照耀便教脂粉生光榮年來
誰識大璞奇暗中空抱真珠明樓頭望斷湘江舟燈
前坐吟巫山屏翠娥顏色自有真花魂月貌殊盈盈
曲中羞澀寂無語銀箏收拾錦囊裏向前再拜謝我
詞願將顏色贈知己

萬松圖

銀餅滿貯墨一斗澄江素練開華堂墨餅傾倒春濤
翻鐵筆一掃雲蒼蒼頰撐斷礪爪欲禿蛟龍鼓戰昏
東洋須臾雲斂漾初日剛風煮海凝高岡岡東岡西
參差出青松萬樹搖冰霜翠濤尚鬱東洋聲白骨磊
砢蛟龍僵

畫竹

清風吹拂君子堂生綃一幅翻瀟湘瀟湘日色映澄
波綠雲擾擾排篔簹紫簫何處奏明月青天飛下雙
鳳凰秋色橫空雁影高西來小雨生新涼凭欄一望
心正遠珮環杳杳江水長試問瀟湘誰輓來都臺鐵

筆那能當吾聞都臺一拙翁甲兵百萬胸中藏典來
揮筆如揮戈烟雲咫尺何蒼茫筆陣如流瀉青玉稜
稜高節凌冰霜對此令人真不俗肉味三月心渾忘
生人清玩足終身菜根一味辭鼎鑪

謝方棠陵批點詩藁

都門一別玉堂客江湖臺閣雲泥隔意趣荒蕪入山
野文章墮落風塵格崑山令尹清婉才豪氣壓倒鳳
凰臺仰視雅騷力追軋如杠彩筆生風雷未逢已有
神交處況是相逢復相契扁舟細雨漫論文斷鐵點
出瓊瑤句湖山曾擅騷人壇作文容易論文難大怪

小怪若不聞作者豈爲傍人看此意慙慙不可說何
當共弔采石月

和方崑山題衙後山石

巨靈夜泣山吐精爛石枯木驚喚醒君詩有神鎮丘
壑逸比神仙清比僧筆勢飛軋千丈峰軒然霄漢誰
能凌搜玄組華出節制風雅爲兵騷爲城力搏李杜
奪關隘曹劉奔走前曳旌回飈飄拂珊瑚樹黃金谷
應鏗鉤鳴東揮西洒殊閒暇始知熟路戎車輕巒峰
久矣委叢薄龍蟠鳳翥膺榮名木石於世亦希遇昔
晦今顯皆天行醉來高帽挂何處虬枝落落岩頭橫

海雲含凍尚未雪樹杪時見幽花明北山猿鶴漫騰
嘯宦中山木平生盟還看歲寒勁操節竹君松丈兼
梅兄身後萬事料消歇百年存我醒翁亭一醒一醉
何須說古今風月元同情襄南遺愛在人心尚有峴
山碑裏銘宮商真韻隱林麓好事寫我流泉聲自古
文章動口服打碑重譯來滄溟

題畫

松梢月色淨如水山影倒落茅簷底紅葉當軒灼灼
明忽憶當年舊知己柴門搖竹驚鳥飛小舟已泊綠
莎渚清興更比剡溪高悠悠江水來千里山中佳夕

是夙期先遣老妻具雞黍泉石餘音待爾傳一曲梅
花白雲起

烏夜啼輓詞

有鳥有鳥名烏烏子母相哺聲相呼悠悠江水青山
靜颯颯霜風明月孤中夜聽之聲轉悲何人感極形
欲枯屋前屋後遶竹遍羽毛愧不如茲雛

梅竹圖

獨倚高樓霜月低誰家纖手理冰絲江風細細梅花
曲湘雲漠漠竹枝詞美人一去天涯遠荒烟野水無
護持何人收拾丹青裏此意復有幽人知

蘭竹圖

猗蘭菴竹調已遠林壑不盡幽人思清風明月如當年
蘭花竹葉還差差欲步離騷不相似高樓無手傳
繁絲故託丹青寫茲意靜中把玩心相宜始知古調
尚可尋在心不在聲與詞

夢梅

道人居此城中山梅花只隔湖山閒夜夜夢落梅花
下六月紙帳雪花打試問梅花尚未開湖山一夜夢
幾迴

贈朱思南春試

君來訪我我不遇我正思君君何處相思不在相識
閒日暮望斷沙谿樹落落乾坤北斗名沉沉風雨江
南句轉眼春光千里人開遍桃花飛柳絮

萬峰深處爲王陽明題

陽明山人讀書處太白山人鎮長住陽明山人去不
來鷗在菰蒲鶴在樹官舫一葉蘇門雨此意躊躇向
誰語忽見漁翁把釣竿鱸魚正美登秋渚

雲山圖

青箬篷底坐吟詩山雨送出若邪溪推篷遠見溪上
山千峰萬峰隱約閒此時獨得雲山意一幅雲山雜

烟樹畫耶詩耶誰較工若邪髣髴曾吟處

夜訪棠陵於江陰二首

毘陵關吏呼不起寒城夜鎖芙蓉水此心轉急恨無
羽出門便覺行路難秋防正急郊關裏
短短江蒲疎疎柳短櫂獨行午夜後水定但覺江岸
走片月輝光轉皎然美人久俟山塘口

驄馬行贈陳侍御獻可

柏臺仙子清遠器雲霄玉立生霜風吾皇借以宣天
威異寵特錫天閑驄長安曙日雲錦紅翠蹄蹴踏塵
埃空綠袍豸繡相輝映百寮動色瞻儀容上虞縣令

初奏功直聲凜凜弭奸雄嗟我識子十年中立論時
事無衆同遭逢聖明諫行日念子豈誇驄馬榮

網魚圖

白白江波紅尾魚蒲花初發柳花疎江洲日暮忘歸
去江魚上網不知數風雨欲來猶不來箬笠且挂磯
頭樹

石上桐用韻答錢朝用

君才有如石上桐古根屈曲枝龍蔥神明扶植百怪
遠蛟龍託迹蟠其中當今大匠執柯斧矩度愆手聰
感胸棟梁委棄徒歎空月鳴鳳鳥孤鳴雄嗟嗟石桐

數十丈霹靂火後當高風良材登用天之公如君豈
得遺江東裁爲琴瑟補大雅乘時進獻明王宮

畫梅

雪畫堂前春午睡夢中遊遍南屏寺湖船斜泊孤山
灣梅花遠映寒山翠湖水澄清湖月明新詩了了江
南意覺來綠葉已成陰東風吹老庭前樹脈脈雙峰
注目中美人不見湖山空呼童拂拭石上桐冰絃歷
亂心忡忡忽覩玉堂舊圖畫似與此夢精神通蕭疎
冷淡粉墨痕雪花點綴春玲瓏相思有夢還有調圖
畫分明堪索笑

龍山贈胡年兄支湖

龍山高處方干詩萬竹生涼蔭龍池故人罇酒水流
漸細切玉藕飛瓊絲山中滋味涼自知六月酷暑時
景移路人吐舌攢雙眉泥潦一掬甘如醴此地此涼
匪我私願君常保雪霜姿尺簡凜凜隨風馳白日酷
吏青天欺我有葵扇聊相贈爲民一揮生微颺

蠶婦行次喬白岩韻

東風陣陣逗憲紙時序新驚蠶月是妝臺起傍臨晨
星繡針錦杼今暫停急往采桑呼伴女東園桑葉恐
經雨舊年苦雨蠶不成生厭鶉鳩桑樹鳴舊年匹帛

未就織候到今年蠶熟日拂拭匹帛裁征衣刀尺入
手少遲違又恐邊地風高寒新綿重復牽合難此意
離離向誰說牽合未合絲頭絕郎衣樣子舊時同燈
下意緒何匆匆

董給事濟之相過賦贈

青紫拾芥少年事嗟君獻策三不利時逢道合策乃
奇入手歎賞臨軒試平生骨鯁諫官宜叢中拔擢社
稷計念昔偃蹇同風塵意氣相期結兄弟青燈旅館
坐深更時事感心欲流涕況是遭逢誠不常官高責
重多憂地白馬朝回謝俗人靜思獻納門獨閉十年

兄弟託相知相與論事乃相契惠然訪我長安樓對
酒不酌瞠目視爲言戎馬報未平兵糧舊政多遺廢
於今料理非君誰君才自是公輔器一指一脛未足
云調治腹心壯元氣鸚雀亦有高飛心喜與鷓鴣接
雲翅忠耶佞耶不同謀諫院千古題名記

次顧未齋韻贈玄墓寺僧天真

滄洲夢落湖頭山尋梅偶爾過松關萬峰老子蛻骨
榻我來重見光明顏試翻舊日枯禪衲塵香剝蝕煙
雲斑法華渺渺浮天外天風吹疊青羅帶湖光倒映
普陀圖波濤出沒龍宮怪講殿金經散雨花山門玉

帶餘風槩丹霞袍笏驚是誰天真親見玄真師飛錫
初停入禪定麋鹿姿性泉石宜高陵深谷觀世變清
風明月叅禪機梅花萬樹破黃昏竹林二月迴碧滋
願言茅茨託歲晚韋編細玩精大衍湖海舟航野興
濃雲霄羽翰塵根斷大道滾滾來千年中有墨者相
資緣能以儒心叅佛法氣骨飄爽成神仙

分得吳山賦贈汪度支希會赴杭

吳山靈爽當斗宿天目縮出東南秀王氣曾占五百
期儒真再孕千年後海門浩蕩遙吐吞天柱嵌嵌相
結構鬼物扶裂何代年烟花爛熳長春晝遊韉飛蓋

集宦遊人閒天府稱杭州岩壑幽尋上天竺乾坤大
觀滄海樓蘇白才高誰並駕甌閩道接還停舟風流
斷事湖山案慷慨弔古雲烟愁汪君喜領江南檄梅
莊竹塢遶行迹玩傲且作地曹郎品題不讓天祿客
擊劍掩抑楚歌聲揮毫點抹吳山色放鶴亭前萬嶂
秋爲我問訊孫太白

東方棠陵

風塵日日勞馬蹄長安十里東復西幾度相過不相
見依舊似隔棠陵磯黃昏歸來閉門坐輕寒雨霽明
星低悠然一念頗自得欲攜吾子尋清谿此意輾轉

計漸真炯炯不寐驚朝雞起來又爲僕隸促眼前咫尺東西迷試論身世對東風楊花飛舞沾春泥

贈棠陵

棠陵散逸如神仙一官雖繫身飄然看花嘯月逢主人長安隨處高枕眠我爲棠陵結行窩十日不見一經過昨夜燈前坐相憶微雨細灑牆頭莎

驄馬行送黎侍御乾德

驄馬御史古所聞今之御史有黎君冰玉丰姿鐵石腸直氣可以排秋雲袖中封事上天子觸冒忌諱明國是臺端羽儀百僚瞻姓名已落兒童耳兒童不知

宰相尊咸識驄馬黎御史幾迴朝集金門東鳴珂紫陌人避驄錦鞵照映雲霞紅翠蹄蹴踏塵埃空天子敕按三川道驄馬到處生霜風嗟嗟勳業正年少豈徒驄馬跨榮耀

次韻題林御史平厓卷

平厓陂陀豁靈爽茵芝初放如人掌採而食之驅俗想眼底日見菩提長有石如屋藏青春叢薄交加雲復障屋下蒼苔古海痕萬劫之前曾走浪呼動巨鰲厓欲移白日乘之托長往

北風二首

北風獵獵吹夕曛騎馬對面人不分雪意轉微雲漠
漠樹頭不定鳥呼羣鴈門早晚羽書急却煩天子親
提軍白頭書生不解事獨看中宵星斗文
北風獵獵吹鬢毛馬頭蹙蹙蒼山高青雲朋友半生
面白日勳名非我曹蘭花菊藥犯秋雪十月春風開
小桃驅馳無地逐西狩孤負恩光紅錦袍

次金華陸汝亨雪葵歌

凍雲不泄壓城黑秃木無聲夜僵立庭前有草與時
格雪裏殘花殿秋色孤標挺挺僅盈尺風雪并威掃
枯迹廐馬長嘶轉辟易吹噓衰朽動悽惻念茲二子

思轉日此心炯炯神明質爲君爲國不自惜墜死黃
生心則一招魂不來杳南北主人已去雪葵室

謝余儀制惠扇

蜀藤如石練爲玉蜀江之水經百濯製作清新手箒
輕錦霞開合涼風生京華年來得高價美人贈我當
朱夏葵榴天色消炎烝滿堂爽氣驅蚊蠅便當珍重
畱篋筥藉以蘅蘭不輕試他日歸尋猿雀君持向山
中揮白雲

東南安別駕黃東村兼呈太守何雱峰

南雄相逢何草草擬在南安一傾倒昨過梅嶺毒炎

僊骨熱皮寒鬱中抱無緣就君青玉案冰壺凍盃色
空皎無緣聽君清夜吟濂谿臺上月空好扁舟臥病
下橫浦玉樹秋風坐中老乃知前約託虛言屈指百
年良會少憶昔雞黍會何奇三年之約千里道半月
相期一山程良會蹉跎成懊惱舉頭可望不可見百
丈文光燭秋昊雙星耿耿遠更明鐵漢樓頭霧如掃

夜泊

霏霏暮雨江灣泊黃昏擊鼓復擊柝數家烟火村樹
昏一丈波濤灘石惡江天漠漠江風吹含香欲發芙
蓉枝月華慘淡照流水坐倚篷窻有所思

題棠陵讀書臺

白龍洞口讀書處長有白雲相護遮白雲疑是白龍
吐書臺靜對紫峰斜怪石當臺降虎豹細流出洞洗
塵沙我來試問方夫子讀得人閒書幾車

緋桃

一樹緋桃色正嬌微風細剪絳霞綃一片飛來明月
下攪我幽思當春宵折之欲贈天涯客芳意清香春
漠漠三月時光不可畱回頭已倦紅塵脚

與茅南垣登山

西山之石如虎蹲西江之水如龍奔山川不改舊形

勢夕陽反照城西門五馬歸來春作伴十年栽植花
成村平生未得遺安計眼底還看賢子孫

謝能公竹杖

山僧贈我紫竹杖拄之直上百丈梯出門月黑山路
迷中天把之扶虹霓虎豹豺狼俱遠避瘦影遙與崆
峒齊偶然擊石山谷應聲徹天門天雞啼便當伴我
遊四方蓬壺閣風東復西

喜雨

四月不雨到五月五月五日始一雨初看搖漾欲溼
衣轉覺汗漫可漂杵園丁抱甕眠不驚田父把犁喜

相語市頭米價頃刻殊夏麥不登望秋黍

觀喜容

丹青試看十年前錦服新裁御賜鞍氣吐長虹輝白
日身爲列宿倚青天勳名終愧麒麟閣回首雲山舊
頭角春風踏遍花柳川駿馬不如雙健脚

白牡丹菊

菊裏皆稱白牡丹淡拖春光壓石欄春光過眼還畱
汝霜露丰姿耐曉寒月中疑是羽衣舞素秋萬里瓊
仙府紅紫芳芬意不堪故殿西風心獨苦

金陵圖

雞鳴山下杏花飛綠楊映我遊子衣幾年忘却丹陽
道瘦馬西風凋碧草白雲樓閣夢初醒金陵圖書開
丹青王基伯業起南服龍蟠虎踞吞東溟秦王知慮
終自殃孫權豎子何足當大明萬年天子氣星躔日
道昭輝光於今宦遊神仙子飛蓋遊韁錦屏裏舳艫
萬里輸稻秔鐘鼎千家長桑梓李白題罷鳳凰臺二
水三山筆底來白頭欲著南都賦登高未讓孟堅才

杭州圖

人閒天府稱杭州滿眼烟花爛不收夢斷梅花聽潮
閣影挂扶桑鎮海樓鎮海樓頭長嘯罷白鶴飛來紅

日下會稽公子曾釣鰲蓬萊仙人頻駐馬過眼流光
幾百年古今興廢猶宛然圖開百戰將軍廟澤及千
家太守泉憶昔此地偏安處瘡痍悽楚干戈際關河
號呼花石綱市井剝削桑麻稅於今一統樂昇平吳
歌越吹雜新聲日落湖船猶未返半宿荷花待月明

鷺鷥圖

殘雲拖雨過塘曲蒼波搖漾淨如玉敗荷折葦風蕭
蕭鷺鷥羣下秋風肅飄然不踏紅塵機烟沙月渚栖
復飛夢魂初破芙蓉沼形影已落雲霞衣鷗鵬鷺斯
各有適悠悠飲啄得盤石自知鼎俎不足膏更笑蓬

蒿亦何窄畫圖託意遠且深無端撩我滄浪吟鴛鴦
不得矜嬌豔羨爾江湖清潔心

餘姚圖爲魏二尹題

天姥橫空浮秀氣東飄直向瀛洲住清流一道瀉姚
江紫霞遠壓扶桑樹龍泉井畔讀書臺世南學士名
不灰客星峰高雲弄影祕圖湖上佳氣開甲第千家
映山水風雷次第鷓鴣起遂令文獻抗中原夢寐英
賢作霖雨嗟嗟魏侯來看海棠陰聽事民不譁青袍
白馬觀風地雅愛山水思移家故繪茲圖寄相憶他
日攜歸長挂壁指點城隅小野村蓬頭赤脚吟詩日

題一拙道人畫竹

一拙道人今不見登堂如見冰霜面蕭蕭瓊玉立秋
風墨汁淋漓心頗工鳳毛縹緲蒼雲底半軒明月浸
秋水我來岸憤吟興雄炎塵一掃淨如洗直節高標
未易攀醉倚欄干重睥睨臥龍百丈忽喚醒恍疑白
日生雷雨

葡萄園

草龍欲飛勢夭矯綠雲曄曄陰晴昊行空朱日不到
地髣髴藥珠宮破曉怪影墮落澄波深泥蟠屈曲神
驪老忽然明月波底生夜光之寶初離抱槽頭夜半

碧翻缸芙蓉甘露奪秋早當時一斛博高官令人却
媿涼州道九華錦衾織作工紫霞滴滴光輝皎慙慙
此意贈相知金刀瑛盤還比好寸根千里冰霜橐貳
師將軍功不小漢家恩澤幾百秋棘垣藤陴亦纏繞
誰人幻入畫圖中筆勢縱橫行入草墨痕變化莫端
倪張顛醉興時一掃

硯歌爲張兩江題

紫雲曄曄石之精太古之始元氣停百丈潭心護水
靈江翻海覆開雷霆至寶出世煩鬼丁紋理歷歷輝
繁星玉工琢之端其形安若瑱兮平若硯潤氣浩瀚

通滄溟墨光潑潑天涵青虛地尚待昌黎銘置君之
囊爲君結劍琴相守慎無缺鳳吟龍吼靜不發莫向
霜途嘯風月吾君自是文章傑文思澗澗復踴跌濡
毫一揮九澤竭得此助之揮不歇萬言奏策天皇悅
他日論功豈相褻推封卽墨通侯列

南臯草堂行爲邵方伯題

姚江江上足容與草堂突兀江之漈千丈光輝映斗
牛九重夢寐兆霖雨經淵藝藪白虎通文第武階黃
鵠舉闕闕門開棠樹陰珊瑚株長蕙花渚憶昔先生
就傅年抱書提硯此周旋題橋磊落風雲筆宰社公

平雨露權萬言策定先憂日八卦經探太極前塵埃
欲辨猪龍隊青壑俄驚鵬鶚天先生始辭草堂出草
堂從此歸物色駿步羣空渥水涯鳳毛彩溢丹丘窟
王家寄託日重煩宦路馳驅轉超逸石田圖畫景依
俦越客吟哦意蕭瑟中外翱翔二十秋拂衣歸問草
堂幽旋馬廳前書帶秀浴鵝池面筆花浮山中宰相
蒼虬珮雪裏神仙白鶴裘蓬島閨臺尋樂屐蘭洲芷
浦採芳舟草堂蘭藥年年發時弄秋鴻度佳夕五侯
歌舞遣豪華九老昆朋聚仙客靜養菩提謝藥方笑
吐芙蓉擬詩格流波淨練長不收傍人指是玄暉宅

石岩花

此花移自石岩阿冰霜不凋堅貞柯花發或疑躑躅
似叢藥繁英豔色過天風吹墮織女錦胭脂斑剝綠
雲羅海鬼擎出龍宮寶珊瑚赤焰搖蒼波白晝光輝
上奪日黃昏火樹燒庭莎百花陣後壓妖豔絢赫殘
春功獨多

月下觀白芙蓉

芙蓉花白爛如雪復有青山送明月光輝搖漾烟靄
消瓊雲一朵墮銀闕我欲乘之踏素波清風前導羽
衣歌月中髣髴環珮影重憶當年逢漢娥

謝楊二檀太守二首

封書遠自泰山至開緘一一領佳意入手琳琅金玉
音盈眸鬱勃風雲字簿書無暇昭曠懷親故相關訊
幽事小野臺高燕雀希長天日落鴻側翅
謝公寄我渾脫帽殷勤千里兼書到舊物如割王家
青風流不減遼東阜稀疎髮鬢正宜溫突兀頭顱頗
相肖安得白鶴製爲裘凌寒直踏西臯照

謝聞雪莊惠瑞香花

謝君惠我雙玉樹珊瑚出海光吐霧枝頭藥綻紅葳
蕤赤立蒼波挺不仆而我承以石瑛盆紫雲脂凝土

如故金絲翠葉爭寒威雪花點綴天翻素臘梅水仙
標格清瓊珠在側形覺汗變理陰陽君所諳防微謹
始我方悟隱隱一脈潛回春汛掃庭除俟青顧

苦雨

四月連雨復五月天瓢無底天河泄山城地高十丈
波下流吾恐爲魚鼈昔日太倉祈晴文再叩天庭言
恐褻南雄之民生事微市門晝閉火烟滅赤脚婦女
抱茅啼篋食誰調愁欲絕吁嗟牧職今太荒農月陰
陽失調燮當餐閣箸不能下一歎失聲轉吞噎

題逸

涯注水桃花細點汗流赭羣龍神姿輕萬
電及流矢陰山狼煙淨如洗綠楊風颺黃
金尾苜蓿園中初過雨奚官拍手醉歌起錦韉燦爛
遊韉紫髯髯君家圖畫裏君家有子神駒比昂首天
衢時一舉青雲步驟開風塵當途氣象何雄偉

獵鶻歌

西風灑灑醒飛鶻角弓月滿弦正急平原側掠猊麋
驚左哨右哨爭馳突睥睨蒼毛甘戀鞬盤飛絕險勢
轉適馬前一片錦雲落連擒雙雉韓彭縛回騅細踏
翠玉聲寶刀倚鞘清霜生共誇將軍射如破犒享狼

藉俎豆

水牛圖

野堂春草新如織綠煙十里散初日苗田如雲小雨
餘一犁功成合閒逸桃林曾論百戰勞田單火陣角
置刀稼穡艱難自年歲須念力盡畱皮毛

送姚玉崖

遊罷燕臺向東海藥籠空空風月在氣酣製作弔古
詞落日大江歌慷慨李白英靈雲水沉罇前喚醒今
千載東海崔嵬白玉崖藥苗已長需君採

後峰卷爲黃伯固題

後峰後峰念吾子玉立嵯峨後峰似霹靂不折神鬼
呵崆峒相對風雲起高人意古一瓢懸落日影寒長
劍倚秋烟重掃振衣岡茫茫注目扶桑水

贈陳劍南

劍山之南丈人廬雲輕霧細春風舒攤牀堆案帙不
整問之半是神農書丈人施藥出城市杏樹著雨林
花疎日暮歸來候者喜笑指橋東嘶白驢

鄧侯酒筵有舞童巧絕戲賦之

錦帕裹頭紅鞵脚短袖羅衫腰一捻當筵起舞巧技
生萬轉千迴何綽約有如飛鳥掠地過又似騰猿接
懸蘿空中一朵攬風花平地翻動銀魚波乃知此童
有柔骨幻體天然墮飄忽却隨絲竹按歌聲險絕驚
人疎毛骨少陵劍器詠大娘嶺南此舞第一場樂事
不必憎惋傷春風且盡使君觴

送陳秀才歸閩

獻卿此日遊雄州梅花燈火讀書樓文章當發子長
筆風塵不敝蘇秦裘南雄太守一何嬾南雄賓榻不
能畱臨岐折柳歌相贈轉目西風鶚薦秋

題竹

葛陂蒼龍欲飛去神仙掣尾畱不住春雷驚破舜江

波秃尾之龍立烟霧江邊老子歲寒心摩挲老眼對
瓊樹長疑壺公七尺杖把之遠踏青雲路

梅雀圖

野田黃雀何所依蓬蒿之下飛復飛一朝飛集瓊樹
上瓊花映日分光輝自知不足膏君饌羞比文禽羽
毛燦生來未試銜環心幽栖且避韓嫣彈

桃花白頭公圖

桃花幽鳥青春暮細雨輕風散烟霧一片流光逐逝
波芳菲忽遍城南路爲此製得畱春詞鳳笙龍管諧
柔絲五雲一曲飄音沒滿意東風千萬枝

贈嚴木山

金紫官階若寒士一道霜威領新旨素懷冰雪抱玉
壺頽然傾倒向知己過我茅堂鬱蒸天芙蓉萬朵映
秋水爲我論文指我迷心骨泠泠潔如洗如此清風
振萬里酷吏驅之若驅暑解民愠兮阜民財坐弄南
薰默無語敷仁布義佐君理潢池炎塵淨不起

題畫

爛墨潑潑雲山溼秃筆塗抹枯樹立飄飄長風
來直送飄航流水急無奈高人磊砢胸極目天際
飛鴻詩魂飄蕩不成句一片秋光無著處

平海歌用韻爲陶揮使公武作

我亦曾跨兩翼鯤海天下下窺清渾呼吸元氣躡神
樞乾天左旋水東奔文武精光未分裂功歌平海慚
白雪將軍叱詫生風雷飛泉出入珊瑚穴直擣扶桑
金烏栖彩霞壓樹鳥初啼牙檣星斗定南北浩渺海
道誰憂迷始知將軍謀略遠天維四整坤軸轉小醜
尚爾奮螳螂潛偷出沒試深淺蛟虜走輸明月晴櫓
割不數魚鰕腥龍宮百靈咸效力鼙鼓還應鯨鐘鳴
誰謂渤海投鞭渡舳艫連結鰲背路六軍合勇挾秦
山將軍素已軼蛙怒先鋒捷報將軍閣將軍雅歌呼
孟崙虎帳高掀雲錦翻平波浴日逃風豚採藥何處
神仙客弔古悲壯陋秦策文章閒雅儒者流況是功
勳奠天澤文有筆兮武有矛身爲虎城手鳳樓歸來
高宴會賓佐斜睨箭末星光流貞珉紀事垂無極萬
古應認將軍蹟大書特書兒童謠四口來觀不須譯
將軍之功不多殺火濤血戰羞赤壁

劉州副擒盜歌

滄州濱海未就治況復連年水災繼良民固窮赴溝
壑村落逃亡門戶廢強橫謀生越禮義操弄腰劊國
門禦倚依草莽潛出沒嗟嗟赤子潢池戲我叨民牧

慚坐視法柄空授今皇帝我僚劉公爲我貳輔匡我
力所未至春生秋殺文武才廓清掃蕩真能事黃昏
聞報卽洒厲秋空萬里鷹側翅方略中定發何迅眼
底游刃無餘地匹馬指揮壯士旋生擒奸宄取諸寄
自古用兵忌濫殺崑岡火炎一何熾劉公自有玉石
辨渠魁殲厥略爾細麗刑允協無再議三木囊頭市
中肆破膚碎骸血淋漓魚斃几上鸞刀利市人咸云
快心志此輩不除我受敝劉公父母生全恩根株悉
拔雲除翳我知劉公將相器屈官一州暫小試風塵
邊境大敵勇我輩驚見鷹揚氣今日之功亦奇哉欲

陳當道旌其異封疏未暇上九重聊寫長篇代碑記
蓬萊館小敘舉人鄭巽齋何可齋因稱王倫敘
遣使致之不至噫余以俗吏偶暇地與時誠難
數者而佳客不能滿會能已於懷乎雖然春風
萬里鵬翮高翔是固可望而不可致也

鄭君何君一相見眼底文人屢稱羨如懷吾君天盡
頭高飲誰家雪當面偶過竹院借靜閑頻呼茗椀重
畱戀仰看八極鵬路空正遇春風羽毛健

賓月臺

主人丰采灑冰雪東堂特啓延明月明月如賓來有

期清風使者導瓊節節按東堂主人迎瑤冠玉珮珊
然聲須臾擁出碧雲上賓主光儀同一清畱連款洽
當天處問而不答亦何倨一觴一味聊自酬主人醉
倒實歸去

送杭州張揮使

將軍有子方青年身長八尺隨龍泉胸胃燦爛羅韜
略豈獨軍戒明三篇綠羅挂■金束腰皇皇寵命歸
天朝海門山青烽火滅浙江亭上秋射潮

送同年魯杜瞻尹故城

同年三百半年少杜君年少何老成崑山片玉初辭

璞姿采蘊藉生光明扣之鏗然清以越合補廟堂之
五英赤墀承命作民牧一琴橫道風塵清看花河陽
正及時駐馬棠陰仍問耕愷悌如君真父母循良自
古登公卿太山出雲興於■何霖雨蘇蒼生

同陳南坡遊張商卿莊

鳳亭山水近四明山光秀麗水色清崔嵬直接桃花
嶺縈迴不遠蕙江城張君愛山復愛水開箇小圃山
水裏阡陌東西遍桑麻池沼春秋種蘭芷小橋斜抱
翠竹溪幽徑別入黃花墅我來相訪賞幽絕畱連偶
值三日雨平生最厭城市居主人高興今何如勸客

飲盡牀頭釀呼童更剪園中蔬高燒銀燭臨池坐雲
端一曲新月墮斬竹便作釣魚竿釣得銀魚三兩箇
冰盤一箸欣共嘗田家百味不能過遂令我飲如流
泉在歌復有南坡和狂歌豈獨數南坡座中豪傑何
其多劍舞秋霜青眼在樽留夜月朱顏酡連日清酣
誇酒聖凌雲豪興降詩魔綠溪匹馬看青山白雲踏
破披碧蘿

畫牡丹

牡丹愛畫不愛種種者易殘畫耐看富貴雲烟一聚
散青春幾度凭花欄昨日鶯聲臨戶庭綺羅酣醉人
未醒惜花心動酒醒後雲錦墮落驚飄零故託丹青
畫此花共誇筆力留年華洛陽甲第突兀起春風次
第來君家

題十八學士圖

混沌開時人始生人品不齊難具名淳朴未散多聖
達天下之治垂衣成唐虞以降小人出外陽內陰渾
凶吉知人則哲帝亦難八愷四凶同讓揖三代治化
稱有周婦人豈是九人儔於斯爲盛孔聖言秦漢人
物皆凡流李唐興王去古遠嶽光河脈漸晦淺求才
縷鎖萬當一評品從茲有褒貶今之人才非古同況

是草莽之英雄一時駕馭將相才有唐事業推太宗
干戈未洗尚文治都俞尚見君臣義後來致用爭奇
功敬宗在列難深議小人少而君子多後人須聽七
德歌畫工亦有區區意萬古丹青不滅磨

丹陽贈劉衢州思武次方思道韻

玉衡橫秋出明堂古衢仁政有脚陽天子書屏良不
忘幃帷壓道多寵光雲翰南垂復北翔青山歷歷水
浪浪神明扶植君行藏敢負如斗黃金章

水牛圖爲陶揮使題

野堂春草新如織綠烟十里散初日苗田如雲小雨

餘一犁功成合閒逸桃林曾論百戰勞田單火陣角
置刀稼穡艱難自年歲須念力盡畱皮毛

伍上虞汝珍奏功北上上虞諸縉紳會新祠贈
以詩予追惟舊冬東山之遊君主盟而同遊者
二謝聯舟泛江登臨兩跳歌宴極娛唱和並麗
踰宿而返抵梁湖驛君又唱爲聯句清風雅韻
想不減新祠予故用韻敘此以贈且新祠之贈
述其功予則敘其情功在民情在友他日同有
所感云

瓊梅日下輝九英春風喜挹仙郎清桐崗萬仞雄孤

鳴彩筆如戈當筵橫筆底芙蓉鏤刻明字字落紙金
石聲東山兩跳如赤城新詩弔古輸精誠山水之間
憂樂并鳴騶到處咨村氓黃昏古驛聯句成燈前意
氣傾生平雨花暗墮楓樓薨杯酒如忘身後名短簫
橫笛喧江程山月夜吐江雲輕回首仙駕朝帝京雙
鳧極目江頭情南浦又見碧草榮恨無羽翰隨飛旌
臯蘭汀芷何處生採之欲贈仙郎行

次李崆峒韻送吳江吳光祿

錦袍白馬薰風前欲發未發仙河船忙向長安扣我
館二吳有弟如惠連老成禮數壓賓座眉目清朗符

青年光輝照我覺形穢秋空氣爽流嬋娟尚書膝前
稱少子更見多賢離繁祉德星聚彩應在吳往歲嘉
占勤史氏一官新得任子恩千里兼有趨庭喜驂騶
步驟道何長闕閱勳名世無比吳家藏書次天祿書
堂突兀依江麓載向金陵凡幾車藝苑文場恣遊目
善談玄理心所耽新得奇編手親錄世上紛紛驕逸
兒鳳鸞羞與雞羣逐

世祀堂爲蔣進士珙題

岳亭之先蔣最昌岳亭侯封挾漢光遭世中微遠飄
泊遂令蔣氏訛爲楊嗟吁本原失所自末流播蕩虛

蒸嘗突兀尚存岳山墓古木鬱秀長藤蒼賢哉琪孫
拜墓下野老指點開迷茫青芻酌酒到泉壤西風落
日增惋傷起家士轉輝赫岳亭世澤奚忍忘殷勤
一疏復初姓又見漢胤重芬芳邇來一百幾十載靈
爽炯炯昭茲堂百世瞻依趨走地羣昭羣穆來踰踰
山花開兮山木落春風扇煖秋雨霜一度登堂一悽
愴乃知孝道君爲倡

爲蘇州王監生冕壽親

山人手移雙玉樹植之洞庭之深處鯨波浩渺絕塵
埃鳳穴光輝吐雲霧春風秋月記歲年連理同心比
夫婦錦衣遊子天上歸山中此日逢初度

漱石爲衢二守陸君題

舊聞吳下漱石子一清可通吳江水作官偶在三衢
閒滿庭碧石瓊玉似問之鑿得衢溪精扣之鏗然有
古聲與子氣骨夙相契取以漱齒生潔清朝來漱之
暮復漱餘酣一洗初醒後蘇門舊有嗜茶風此復一
漱功乃懋與子坐談玉雪飛冬月梅花點客衣齒牙
不挂烟火食平生冰蘖心無違

用韻賦贈王鳴和太守

人生貴味辛與苦甘美過傷脾病土人生涉歷快意

多出門何以當威武孰知吉凶禍福衝吾心得之良
有主此理驗之古誠然夬履貞厲履九五偉哉王子
大丈夫赤手撐牙當虎怒訥言柔兒一書生眼前俗
子敢嗤腐作事磊落不同流節義真爲世教補奴視
權奸氣吐虹一疏上達何憚魯三木爲囚落詔獄鳳
凰東縛野雞舞幸逢聖明不可欺依然雲路振儀羽
昔日沾頭談此事敢謂樽前語誇詡士林詞賦動黃
鐘慚我野音鳴瓦釜三年閣筆不敢題棠陵長村勇
先鼓五馬輝輝向武昌畫船旌旆候江浦過拜高堂
錦服明更喜天年過希古重尋舊日讀書堂玉樹金

蘭繞環堵人生禍福天定時今日試觀王水部

鐵梅予旣爲養敬賦養敬少之遂信筆一首

鐵梅之號何所以我是鐵梅之知己乾坤孕出貞石
骨煽以剛風堅其髓冰花片片出鎔鑄風塵迴立瓊
瑤樹枝柯雖與鐵色同玉中能辨荆山工人云鐵梅
知不知玉梅花下長相思

偶過池亭見海棠已謝悵然有述

癡童失報海棠開孤負芳情把酒盃幽豔初新我不
來粉紅盡退美人腮細雨柔風俱不管花魂渺渺赴
陽臺

送嘉定蘇書辦

蘇子白面黑脩髯軍門杖策清勤兼烏紗錦服暫歸
省頭角崢嶸鄉里瞻松菊門庭添鬱秀葵榴風日肖
蒸炎堂前阿母古共姜笑迎遊子鉤青簾

寄壽韓元

不見婁溪韓隱翁十年信息幾迴通歲月催人雙鬢
老隱翁今日古稀逢林下散冠裁翠竹山中野飯啖
青松聞知顏貌更復少欲從東海共騎龍

張秀才別號湛泉

細雨霏霏橫浦船有客來訪文翩翩病臥不能接一

語臨別索我題湛泉江湖浩蕩道者霖雨潤澤明
時賢苦憶湛泉不可見夢落青松白石邊

風雨

雲壓湖頭風雨急燈火無光寒氣襲暗中怕有豺狼
行黃昏按劍還獨立明朝天色復如何舟航萬里暫
蹉跎年來京國江湖想一入江湖憂更多

杏坡爲呂醫士題

道人高隱清江城杏花萬樹映江明朝來一片丹霞
色食之可以度平生道人顏色日漸好春意拍拍盈
懷抱手製奇方濟世人閒來欲訪商山皓人人呼爲

杏坡仙杏花結子東風前

寄吳希臣忠

石君來到書始通
開緘如見故人容
慙慙遠寄蘇州
絹萬緒千絲色轉濃
頗覺頭顱經歲月
空將信息託
魚鴻何時共泛蘇州棹
霜月楓窻半啓蓬

贈徐良瑀

十年相識徐孺子
下榻雄州顏色喜
酒杯花下睨乾
坤碁局燈前坐
風雨慨慷重見北海賓
隱淪擬作西湖主
不惜黃金買翠蛾
畫船日日歌金縷

謝錢節推

錢君送我沙水寺
冰壺凍碗慙慙意
新秋氣動白苧
衣薄午陰生紫羅樹
我去朝天君守雄
牧民事業古人同
西清物色煩持護
來歲還期賞碧筒

贈蔣翁

蔣翁鬚鬢映雪明
蔣翁顏色秀而清
精神疑是道者
授秋風躍馬豫章城
大將喜遇王夫子
命之部領偏
哨兵羆貅猶帶岩峒氣
束縛不作咆哮聲
長繩繫首
彭蠡鯨鱗割不數
魚鰕腥大將賞罰何公平
厥功細
大聞天庭蔣翁之功亦見錄
青袍烏帽鄉里榮
嗟吁
眼底膏梁子一旦虛生亦虛死
把酒贈翁雙眼青
人

生貴作昂藏士

題詹德溫石崖卷次方思道韻

後川之崖何高高玲瓏天柱撐丹霄飛鳥不度愁弱
毛七星旋轉礙其杓攬秀可染仙人袍古樹不折許
由瓢俗人欲上力誠勞長髯老子叢桂招石局分部
猿鶴曹虹霓挽作渡河橋高居遠望氣轉豪年來養
就神仙標一食一飲烟火逃春風咀嚼紫芝苗

贈沈東軒

東軒老翁邀我住軒下一林紫蘿樹曉來日出雲錦
紅瑞氣一簾凝不去老翁高誦玉樞經我正新剪笑

蓉句兩意悠悠各不言箇中卽是參禪處

醉書羅本深壁

杏花樹下酌春酒東風吹面酒易醒青山墮落酒盃
裏酒盃對此何須停雲光滿地日杲杲花陰覆席春
冥冥兄弟如君情不厭落花風雨還同聽

贈陳子燦

看君大書何奇傑越山樵者興初歇看君把筆興方
濃銀鈎鐵柱恣蟠結我有門楣千尺高羨君書法今
古豪爲我大書照日月光輝且壓閭里曹

鐵梅爲諸養敬賦養敬少之信筆一首

剛腸不屈劉元城千載人知鐵漢名
昆吾山邊埋玉骨瓊枝玉樹一時生
君山老人梅花曲洞庭三弄盡商聲
夜看金氣凌牛斗不知乃是梅花精

東江爲楊時瞻題

先生自是城市居託迹東江意何如
扁舟一葉春風裏細雨獨釣桃花魚
紅塵昔日路途倦青山此夜襟懷虛
我歸亦解浮雲態欲傍蘋花結草廬

題畫

子規啼遍春山裏鱖魚初試桃花水
樵者得薪漁得魚所求各得心何如
相逢笑語同歸去白雲迷沒家

何處黃昏慣踏溪橋路指點門前古楊樹

寄孫錦衣伯泉

橫身欲抑彭蠡波赤手欲斬妖與魔
豈徒文武冠天下忠孝堂堂第一科
五鳳樓前監綵仗八駟道上動鳴珂
聖主正隆勳德報丹書耿耿誓山河

壽詩

我愛樂安湖上叟隱居湖上樂安久
少陵潭畔歌百花靖節門前栽五柳
香浮秋露芙蓉盤氣鬱春雲醺醪酒
百年詩禮看趨庭鳳凰舞兮麒麟走

壽星石

壽星有時化爲石春風吹之玉顏色巉岩頂骨雙耳
垂蒲葉紛披八字眉青天無雲夜吐氣南極祥光照
天地草庭對之養性靈時點頭兮講道經

荷花

荷花不開無奈何荷葉轉盛青婀娜細細香風飄薄
暮重重清影覆蒼波美人佳贈盤爲玉俊士新恩服
換羅曾向窻前聽急雨半窻秋韻繞庭柯

爲中書吳惟德題鸚鵡塘

聞說君家鸚鵡塘青山遠映水浪浪前有禰衡後李
白品題千古重文章漫憶涯翁畱綵筆擬遊仙洞過

茅堂烹茶煮笋他年事爲我先栽紫竹牀

贈茅克垂

茅家兄弟皆可愛二茅風韻更飄然黑而且長如鐵
漢中藏美玉卞和冤放浪形骸詩酒裏馳驅場屋俊
髦前我歸獨擅安石墅君貧莫吝賭棋錢

愛日

椿樹綠兮萱花黃庭階白日生輝光孝子愛之心無
極安得此日如年長金烏西飛不可畱蓬萊歲月終
難求唯有仲尼明訓在以色養親消其憂一日不憂
如一年一年不憂如千秋崇官豐祿亦徒爾忤意拂

佛小野先生集
心生亦死空向高堂泣畫圖眼前誰是綵衣子

松鶴圖

飼之曰俸乘曰軒我非不感君之恩江湖野氣不可
馴長風翼我游乾坤海日初上崑崙頂羽衣露乾弄
雲影遙向青田啄玉芽夜宿松頭萬山靜深林瑞霞
四時青鳳凰鶯鶯翔蒼冥草堂物色得所依細細茶
烟夢未醒

淳朴園

蓬蒿不斬長於竹野藤之蔓直上屋松柏自穉不盤
束礙日撐天森矗矗鶴不籠兮鹿不樊如在天兮如

在谷風月浩蕩入吾廬白雲亦借簷端宿撫弄一張
無絃琴餘音不盡還往復素書一卷無一字默而對
之三誦讀

題畫

道人長住秋谷裏白雲鎖斷谷東水人間迴若縹緲
閒金城玉壘突兀起石田新長芝花紫採而食之能
不死一曲商歌太古音霜風折竹落松子

贈杭州劉節推

劉侯降生執法星天帝敕典杭郡刑劉侯之才新發
矧光芒照地天爲青發姦摘伏神驅霆天帝藉以宣

威靈書生訴盜登其廳白晝攘金遁其形劉侯卽時
差捕丁有盜斯得係■纓置之於法一市寧書生感
德心自銘劉侯通律先通經經以用律律愈精天帝
知名書於屏徵取司平佐法庭鷹兮有風揚其翎豸
兮有角不可撓

芝莖石

菌芝之莖何婀娜化而爲石何磊砢鬼丁掇自崑崙
峰仙人煮以霹靂火歲■嘗帶紫雲根春■重長青
霞朵七明九光輝■堂上壽之徵云在我

醉香亭

百花香霧漲林藪露濃霞蒸三月後濛濛撲鼻復沾
脣煖沁詩脾醉於酒夢爲蝴蝶宿花房醉香深處無
何有吹面不醒芍藥風亂紅如雨坐來久歌聲宛轉
喚不回黃鸝對對鳴翠柳乍醒更惱醉餘馨茉莉■

花逗南牖

老岩

老岩開闢是何年疑同滄海變桑田岩頭古蘚沙浪
痕歲歲春風吹不鮮怪松乃是蛟龍化猙獰爪角猶
宛然有石嵯峨似鐘鼓鯨鮪未死聲徹天有若人兮
抱古樸直氣磊落非便娟首戴■冠切雲漢腰懸寶

劍開雲烟呼猿叫雀爲伴侶風清月白岩頭眠

用陸二尹韻壽詹母

眼前不羨滿籬黃日喜平反報北堂瑤池王母獻霞觴
東方小兒優語狂壽筵侑以神仙樂紫雲一曲壓
伊涼

寄新昌曹大尹

曹公坐治新昌縣神明之治真可羨已爲蒼生作雨霖
堪與天王掌雷電求者莫按騏驥圖美哉足媿循良傳
飛揚萬仞待秋風摩挲老眼瞻天漢

鶴齡

仙胎養育崑崙嶽骨清肉輕神態遠春雨琅玕未實時
啄食青田香玉軟一聲嘹唳落青霄蹁躚羽衣舞正嬌
千年幾度瑤池會見我三偷王母桃

次莫一介韻

山翁何事色枯槁忽動神機面如掃風雲踏遍闡闔門
歲月夢破邯鄲道笑探春信意重重坐弄夜明輝皎皎
菊花開罷梅花開與化爲徒不知老

二

山翁在山何綽約守雌猶如處女弱酒後揮毫天與
狂花前倚杖風不惡十雨潮痕沒柳隄半空月色留

蓮閣不知門外勢，翻天虎鬪龍爭試奇著。

題畫

野翁已得輞川情，忽看圖畫眼偏明。岩雲重掩泉石色，江草微含風水聲。野翁之情君知否，桃花已熟山中酒。側身天地觀烏飛，菩提樹長坐來久。渡舟往返，春秋世事紛紜復何有。

贈琴士

夏宵明月登高臺，天末蕭蕭涼風來。白苧短衫寒透骨，冰天無處著炎埃。疑有高人弄化權，秋鴻一曲秋柄迴。問之是誰不相識，哀猿怨鶴空徘徊。請君莫奏

梅花調雪陣，紛紛撥不開。

東岩

海濱有山湧如玉，海水翻濤打山足。大石墮落如岩，昂道人每向東岩宿。朝來彷彿扶桑光，蓬萊倒挂岩頭屋。九十年來觀世紛，乘鶴遙上閬風曲。而我問之重歎嗟，但遺手植青雲木。一株分作二株榮，竇桂王槐花簇簇。

默泉

龍山有泉默而流，泉源來自龍峰頭。奔騰無聲海波應，掩遏不住雲氣浮。春日作旱欲喘牛，往來飲之厥

病瘳功論餘潤遠以周不數當年橘井秋

過韋德容宅有題

名園佳樹幾千年一廻相過一廻憐却怪主人意疎
蕩短茅繁竹雜雲烟因歎主人陋巷賢明珠此日光
沉淵風雨清秋嘉樹撼主人抱泣聲徹天

洛神圖

洛中有女古帝子化爲神仙長不死容輝微弄星月
灣形影半隱烟霧水神仙亦欲畱其神惟恐好事傳
失真才華詩思如子建一時付託誠茲人雲山日落
依野樹過眼神光飄響度心聰默領一寫之詞客登
堂稱此賦今古丹青幾擅場真意凋殘堪惋傷千載
之下空想像畫師筆力紛爭強嗟嗟舉世求真者當
途四顧塵茫茫

天池山

天池之水長不乾天源隱
月輝倒映蓬萊
色六月高涼菡萏寒丈人釀得長生酒不數當年玉
露盤

倪小野先生全集

七世孫 繼宗 編次

長短句

沈石田畫爲姜吏部夢賓題

吳中山水稱石田家家屏障生雲烟一時謬託不復
辨遂令畫史虛名傳石田妙於詩詩亦有窮處於焉
借丹青寫我吟中趣君家茲畫真無價惟我知詩乃
知畫雲山意態千萬重樹林窈窕雲山下曲曲溪流
如有聲尋源只見瀑流挂青鞋緩踏碧苔路囊琴未
解江村暮鍾郎不遇何足嗟天機物色俱超悟我觀

茲畫忘歸期彷彿如在西湖時興來獨出清波門自
惜當時麋鹿姿主人勸酒盃到手盃中烏帽影參差
山林案牘殊形迹令我能無丘壑思倚竹看畫思漫
漫君家竹屋休長關

寶松歌

君家有松樹松下寶松軒寶松之意難具言吁吁此
意深且長前人栽此南山岡望以充棟梁未以傲雪
霜松兮自蒼蒼人兮何茫茫吁吁此意深且長上有
枝願拂天恐天有限而枝屈旋重雲鬱霧休摩乎其
顛下有根願透黃泉千歲變茯苓萬歲化琥珀龍蟠

虬糾遍生乎九淵好鳥願來栖惡鳥休來啼虎豹礪
角鹿礪蹄我心惻惻傷以悲我願爲女蘿纏綿萬尺
護枝柯冰鏗霜淬凌歲寒風暄日麗生春和恨不託
根徂徠之嵯峨願借巨靈神力潛移默運過江河奇
峰疊嶂軒前羅此松安置青雲阿桑田雖變海此地
無風波天地有窮盡末末無消磨幾經闔闢不爲多
沉思忽杳渺涕淚垂滂沱寶松之意至此無奈何此
意深長漫賦寶松歌

題張千兵廷鎮平海卷

六合之內皆王土祖宗百葉脩文武海涯小民頑且

魯操干戈抗州府尺書報朝廷廷論謂宜搜出廟略
耀皇靈旌旗擁日月號令飛雷霆當時良將多超距
小者比韓彭大者希伊呂帝降手敕曰在汝張將軍
先鋒獨出東海門百艘兩翼分一鼓萬馬奔呼濤叱
浪渤海渾穹魚昂首肆吐吞長蛟毒螭出沒左右軒
乾坤氣定神閒指揮之下安如山回顧海水還潺潺
酣戰日午誠閒關羣兇授首凱歌還春生秋殺奉天
命一方保障寧以靜功勳一將風雲高懽忻萬竈鼓
笳競平海有頌三吳賢我今聊賦長短篇

張叅軍歌

卽廷鎮

張君氣骨摩青空鬚長一尺生雄風來佐鎮海立奇
勳千里重見髯叅軍婁江春日百花發官航一葉乘
紅雲袖中黃石書妙授秦漢初太平時節斂方略五
斗欲老東海儒當今鸞詔遍海宇廟廊利器君自許
別意慇懃春半天金鞍細洒綠楊雨

贈范棊士歌

機心甚於兵肝腦塗地苦君有機心笑談閒聊以侑
樽俎嗟嗟韓白徒貽笑互千古機心如君或與韓白
遇爭衡四海英雄伍青年挾策走兩都賓主交定動
部府我亦傳得爛柯經醉後脫冠搏龍虎無乃吏事

困簿書爛柯經匣半塵土新漾江上喜逢君一枰未
了春日午

別江揮使廷俊歌

江公今六十我今四十一屈指百年閒世事幾閱歷
公今見我好顏色別後聚散不可測不知到得白頭
時觀君白頭雙眼碧世閒萬物遞消歇寒暑不變惟
金石我知生死有定數知者非我人共識當此離別
淚沾臆燕鶯春花柳密芳草滿地可作席共君一醉
笑談劇蘇門東望海霞赤思公欲見不可得且將一
缸桃花釀痛飲直到月生壁

尺石池

長江涸赤壁拔五丁鑿塊石渾旁礪石髓中剝腹空
豁仰置呀劃天飄落萬竇呼泉水澄活凝視蟠黑龍
縮角風刮刮魚潑潑生新出惡嗟嗟君子之池兮君
子之樂

題鄭宜簡三友同心卷

世人重結交罇酒話平生堂下拜妻子相呼爲弟兄
轉眼利害僅毫髮宿醒未醒睚眦裂主人壁上張郎
題丞相筵中灌夫縛世途茫茫共誰語湖海今逢二
三子親戚朱陳村詩書杜韋里黃金博歌笑白首歸

桑梓冰霜明道義膠漆固終始此意漫向市朝求落
井下石汝輩羞欲著青鞵東南遊與汝爛熳吳淞舟
擊碎玉唾壺歌此激濁流

秋日題畫贈顧朝楚

野水沒蒿蕪滿地悲江湖一葉扁舟隨野夫煙波裏
江寺孤依泊竹木疎君來訪我日初出天低樹杪飛
白鳧茶烟一抹栖枯蒲知我宿處遙相呼此意殷勤
無以贈新詩一幅丹青圖

聽錢心漁吹簫

白雲阿裏青桐屋萬嶺松杉寒夜宿紫簫老人自城

來爲奏赤壁當年曲使我聽之神欲飛飄飄秋霜流
鐵衣似向江頭立江月百年誰謂知音希遼西不見
回書雁獨倚高樓幾聲歎嬋娟深鎖朱門閉隔窻道
我相思意東家少婦新孤寡燈前嗚咽雙淚下履霜
之子無限情還向膝前悲不平纖風動青蘋雛鳳鳴
高岡泛泛落花隨曲水悠悠千里歸滄浪

且如此

且如此且如此素位行之而已矣朝作夕休水流坎
止秋雲淡過日春鳥鳴感耳去之不可畱來之不能
拒且如此且如此菜根有味聊自甘茅屋未破安須

理放舟長覺青山隨開窓只見白雲起讀書友聖賢
飲酒忘爾汝黃閣事業掀乾坤丈夫得時龍得雨

拙逸

錢塘江舞潮郎浪頭踴躍如尋常翻身不給江中央
巫峽川逆水船犯險曲突岩崖牽卒然牛馬相枕顛
泛泛一葉洞庭裏今日風波今日止不與造化爭利
便風檣雨楫隨時使我無舞潮逆水手平生不識龍
門口當時自愧不如人不如人處安吾身

清浦怨

清浦水流不止遊魂隔千里清浦有流移妾心堅自
持清浦有塞噎妾心未自潔燈前暗雨想風波夢魂
夜夜清浦河豈不念婦人不下堂百年幽恨當如何

送琴士

攜琴上燕臺彈罷燕臺月春夢繞江南旌旗侵曉發
歸去還尋猿鶴君南零峰上眠孤雲梅花古調弄江
水我立青霄應遠聞

春暉堂爲唐侍御虞石題

春暉堂畫錦日蒼顏阿母眼如漆鳳冠戔戔德在躬
牙繡煌煌歡繞膝憶昔春暉涕淚前呱呱兒女啼相
牽冰霜不廢孟母織風雨時頌共姜篇念茲冰霜與

風雨一朝消盡春暉吐芳菲景畱三月花翱翔輝動
五雲羽春暉之草植瓊園拂天枝葉華且繁報答寸
心應不盡長養至德難具論春暉堂下南山好玉燭
長調春不老一年一迴驄馬道年年感此春暉草

姑蘇圖

我昔曾爲太倉守問災三吳忙奔走十朝風雨不開
晴洞庭水接白茅口波浪飄搖畎畝閒稼穡爛死雜
蒲柳村落逃亡煙火希春風燕子不知歸今朝偶閱
姑蘇圖重重樓閣映江湖華堂笙歌按檀板彩興簾
幕垂屠蘇吳趨坊閭門道眼前佳麗今稱好不知茅

屋與蓬門日色荒涼半秋草安上門有鄭俠賢有圖
直獻君王前乃知畫者抱深思丹青豈獨絢山川

長歌送舉人下第

風塵蹭蹬憐吾子落日獨步燕門市長劍陸離頻睥
睨欲試未試誰知己誰知己將奈何且彈長劍高聲
歌黃金柳條映微雨玉河流水揚清波紫埃拍拍東
風和吹上君顏生婀娜蟲雞得失尚未定鸚鵡高下
誰云多憶昔公孫弘六十猶未遇徘徊公車開落魄
遊何處終作漢家鐘鼎臣白頭事業青雲新雙眸炯
炯舌尚存何況吾子猶精神且收書篋歸東越蓬萊

山上多瓊雪餐之可以沃心熱心清自得神仙訣神
仙本近王皇家起來重看金臺花

搗衣篇

搗衣復搗衣。搗衣對明月。玉腕白於霜。月色同皎潔。
西風驀地起塵沙。凋我朱顏與怨嗟。似爲郎君報邊
信。愁心此夜繞天涯。踟躕停玉杵。雙淚下如雨。生來
不識字。無由致私語。憑將衣上針線迹。一針一線疎
復密。行行宛似相思書。開緘見之燈火死。

竹林七賢圖

清風吹竹林。春江映晴碧。烟雲爲圖書。天地爲幕席。

四座羲皇意正閒。一枰楚漢戰方劇。問之此迹何代
傳。云是晉室之七賢。形容物化幾百載。文彩風流今
宛然。八斗山尚書一石。劉先生痛飲各滿量。翛然遺
世情。何內向子期。陳畱阮嗣宗。玄談鬼神避長嘯。巖
壑空阿咸琵琶不脫手。興來豕吸大盆酒。目光爛熳
巖下電。阿戎清賞來何後。石屏峩峩鳴琴張。高調壓
座疑嵇康。龍章鳳質不可貌。丹青之意無乃荒。神仙
有象何處真。廣陵一曲傳其神。

宿瓜州熊氏樓

百尺高樓突兀起。管絃盡亞紅塵市。春光浩蕩白映

空雲影搖漾前江水前江水弄畫屏林巒轟轟連赤
城海門烟樹上朝日珊瑚欄檻江輝生我來登眺當
春初石屏殘雨梅花疎青綾帳底借高枕且枕一卷
羲皇書夢魂轉清越虛疑打窻雪棟角銀河橫簷牙
冰月缺何當獨立聽鳴鴻老鯨夜送金山鐘驚呼主
人語茲景此身如在中潯峰主人默不語相對無情
緒欲呼白鶴乘之遊江北江南迷處所迷處所將奈
何主人按拍我高歌黃梁未熟夢未醒富貴休作尋
常過

鎮江圖

長江萬里奔海門金焦二山控扼無以肆吐吞元氣
遏塞雷霆鬪怒聲震蕩搖乾坤鯨鯢吼兮蛟龍逝血
戰波濤似平地英雄勝負不知幾百秋眼前江水今
悠悠曾採蘭蕙與芳洲落日更登多景樓試問英雄
迹野老指狼石孔明有長計吳臣當屈膝明主按劍
起乃識中原賊苔花草色迷其處紫烟紅霧輝輝靄
沙樹江山佳麗今如何漁人一曲清平歌我欲和之
獨坐中冷峰但見水浩浩而山峩峩

劍池歌贈石生

虎丘何崔嵬云是吳王墓鑿池徹九泉岡巒復阻護

中藏寶劍幾千年金精光吐上燭天白石雷霆山石
裂萬仞之底沉龍泉臨池高呼呼不起眼前誰是風
胡子張雷亦是希有人令我悵望延平津知君久鬱
英雄氣風塵滾滾埋其身笑傾一斗酒爲君洗雙淚
壯士掩抑歌天星落芒彗劍今人今兩未遭匪人得
志操鉛刀赤堇山靈泣清旦昆吾迷沒紫石爛

墮芝石

商山商山何磊砢長風萬里吹來紫芝朵鏗然有聲
當我前墮傍人指爲石肉髓甘膩人不識學得仙人
煮石法爛煮此芝還大嚼

閱武

南雄太守紅錦袍八騶橫道開旌旄下場閱武試龍
韜諸葛眼底無孫曹堂上授方略堂下聽指揮雲屯
星布雷霆威四圍魚麗合雙分鳥翼飛中有猛士突
而出手輓強弓三十石駿蹄如鷄踏浮塵翻身放箭
巧破的鎗手舞長鎗青蛇丈八長電光盤赤地白日
生彗芒鐵鉞夜叉頭復著羆虎牙黑風海鬼立殺氣
偃塵沙霹靂連聲青海底萬騎銜枚寂不語左哨奔
度東南隅恍惚颺風送急雨橫笛短簫韻清平干羽
舞罷和氣生矢石之間有禮樂肅肅雍雍仁者兵陣

韻遙分芳草地軍容新整桃花營南雄太守職專城
賞罰之典今公行罰者不怒賞者喜一軍號令推神
明一軍號令推神明郊門之犬夜不驚

聽潮閣

五月二日登吳山道人坐我聽潮閣萬松風雨坐來
收白日猶疑風雨作開窻遠看洗漾閒平地一瀉銀
河落初疑茶沸隔竹扃轉若甕盎相擊春滿城縲車
激午風乾坤轟劃鬪蛇龍悠然直過江天末千軍夜
喊如逃鋒何當赤日燒青空借我一枕高臥吳山峰
聽此解其意起鼓三尺桐攜之遊四方洗彼塵埃胸
君不見繁絲弱管謝歌袖聽潮閣上逢清晝

悼安黃門繼母

母慈子必孝恩至氣亦通悠悠千古後此日還淳風
賢哉安母初歸時安氏之子呱呱悲拊畜顧復如親
兒安氏之子就成立九霄高奮青雲翼回顧六尺軀
念茲恩罔極死者之恩不可報生者之恩冀可

日圖升斗奉親權萱花零落西風寒
十里望風號白雲飛散天漫漫
鵲母當時純孝今如
否吉甫妻履霜中
怨以淒安氏之子哀之深乃見
安母慈愛心

題蘭

君不見楊葉青隋隄風雨春冥冥又不見桃花碧金
谷三月無顏色繁華過日不可畱幽蘭遲暮芳清秋
君子懷之如夙契故託丹青寫幽致會稽山人筆人
神桃花楊葉無生意當時憔悴湘潭人此心獨向蒼
梧陳結縞佩服慕芳潔至死不忍離其身不獨賢者
聖亦爾猗蘭一曲雅音起顏琴點瑟誰與傳千年和
者有韓子我登君堂聊賦詩氣味於我偏相宜主人
何必種九畹願言此意長如斯

夜酌金宗德宅

花盈枝月當戶三月逢十五羅衣新試紫陌風時光
豈得閒歌舞主人儒雅心近古華堂夜宴蓮花吐黃
閣詞章耀日輝大袖高冠列文武我官滄洲慙無補
觀風海濱有鄒魯一時傾蓋南州才尺刺未見投官
府但逢好景開樽俎僚友交懽不相侮張將軍姜吏
部叅軍之子更楚楚眼前長得數君同此樽始知青
春不吾負

爲衢州徐進士良節南峰卷

南墩山高高南墩書院山週遭南墩先生隱其中儲
書萬卷遺兒曹桂芬蘭茁瓊玉標南墩去後繼者誰

南峰結屋南墩隈南墩高高多奇峰獨有此峰鬱秀
開白洲書扁大於斗南峰有繼南墩後雲谷輝光草
木香簷下日見麋鹿走我欲訪君未問途今日試觀
南峰圖緣溪綠竹夾清流溪流曲處茅扶蘇君歸南
峰愛丘壑此詩贈君何落落相思無奈展詩篇新月
暮挂南峰角

爲高秀才世美題南屏卷

青波門外綠楊雨湖光洗我看山眸千峰萬峰看不
盡南屏山色湖上浮何當更泛蓮花舟紅樹如花發
白雲如水流光景多變化獨藉詩篇收歸來忽逢南
屏子解我詩囊喜相語自有南屏山來無此吟山靈
夜泣風雨秋沉沉爲君書此短長句好挂南屏讀書
處

送湖原明進士南歸兼壽母

憶昔兒辭母母云兒去莫空歸旅食京華二十載名
成歸省萱花幃重把舊縫衣白日生光輝母云白日
之光輝出門須念舊斷機兒云三公亦漫爾二十年
來甘旨違但願階下春草長芳菲雨露長養三春暉
鶴髮復回黑象服長明緋

爲徐中甫題畫用何大復韻

羣山簇簇映林薄，隱隱寒泉石中落。湧作春江幾曲流，曲曲環浸沙田脚。前村後村鳴鶉鵠，斷雲一片山頭孤。雨意倏有還倏無，老農俟餉隔江呼。農事及時當耘鋤，東風吹盡生江蒲。江蒲青青江樹綠，人家斜抱春江曲。棋枰畱客日看花，茶竈當軒烟繞竹。緣知此境桃源是，却觀圖畫風塵裏。王維空置輞川莊，昌黎遙詠盤谷序。悄然坐我高眺邊，夕陽古剎明遠天。而我觀之心緬然，未能脫迹尋神仙。君不見山林朝市各有緣，至今誰泛桃花船。

題秋香玉兔圖送翁別駕之成都

臨衢白馬行踟躕，贈君聊題秋菊圖。三十年前看花夢，西風吹醒遊成都。羣花早發還早落，踏遍紅塵猶健脚。幽林深谷冷艷邊，愛向餘暉玩霜萼。成都官舍山水明，成都別駕襟度清。此圖相對發清興，高歌爽颯凌青冥。君不見嬌鶯乳燕飛芳草，虎豹縱橫荆棘道。何如菊畔明月魂，飲露餐英長不老。

荷亭偶書

日坐荷花亭，荷花如美女。無處着塵埃，清風夾細雨。愛花之心，古人同。纖月初出瓊瑤宮，彷彿環珮乘游龍。香魂淡淡水波空，當年子建招不得，喜我晚歲還

相逢相逢不可久零落秋霜後情好結中腸製爲芙蓉裳服之頗自好吟踏若耶道

冬日

冬日可愛兮茅簷竹戶疎林敗葉積頽堵日光照我
輭草裊隔歲寒袍木棉補瓦盆盛酒兒孫舞頑孫捋
我鬚驕兒枕我股一醉不知日過午嗟嗟乎簇紅爐
燒翠釜烹鸞膏炙麟脯我樂天然不外取嗟嗟乎此
不足數

樂閒

天地閒何可樂唯此身無束縛婚姻已了事逍遙功
名於我雲輕薄風情行伴水邊鷗秋聲臥聽山閒鶴
淵明有賦君觀之醉醒無端分好惡

寄胡竹西

久別竹西君相思對暮雲平安頻有報鸞鳳已成羣
上海舟航十年思銀箏錦瑟醉歌裙江頭悵望真如
夢風雨蕭蕭秋夜聞

題杏林橘井圖

杏林風橘井雨飄瓊雪流玉醴瓊雪玉醴上壽丹骨
換胎移腸若洗昔人妙術今誰傳紫草鄉市有半仙
江山隔越不可見有圖看來人宛然翡翠苔蘭上珊瑚

瑚水月邊坐觀白石爛笑指滄溟遷歲星落人世非
狂亦非戲市朝且浪迹醫卜聊試技
曼倩書頗
解至人意杏林橘井還優游
人不知爾亦休白鹿
峰頭長嘯日一家雞犬亦丹丘

用韻爲四川王都憲賦

五湖風景好今日有誰爭雲安老仙歸去來白頭餘
興繞青城老仙元是雲臺客赤手曾煉補天石上爲
吾主張翰蕃下爲吾民置榼席素秋河漢懸瓊瑤白
日雷霆震砂磧老仙顏面不可逢傳播芳馨尚堪挹
我亦慕仙者蓬閣阻雲天嗟嗟室爾遠徒歌好德篇
尋真渺渺疑無路寄語悠悠欣有緣春風得駕滄州
鶴蟠桃會裏卜他年

鵬海歌

陸公諱遠字九萬鵬海其別號也憶昔李太白爲司馬子徽所知作大鵬遇希有鳥賦以喻其意予接公於盃酒笑談閒見其學博才朗韻逸悟超玩弄世故不以區區介意則茲官固其寄也曷足爲礙誠所謂可與神遊八極之表者鵬海之託不亦宜乎夫人孰不欲爲鵬而未知夫海也無礙則海有礙則非海

予故掇太白之遺馨謬以希有鳥自居爲之
歌曰

有鳥曰鵬云是鯤之所化一吸爲秋冬一呼爲春夏
龜獻九疇龍呈八卦是何洩天機於下土不若茲鳥
抱渾沌而閒暇觀其揚飛大海縱其所如直與乾坤
相下上不知日月之居諸白蜺青虬道無極逍遙適
意豈說廣寒之墟有若人兮託以自名揭孤志而迅
征薄遊湖海識豪傑飽飡經藝掇華英自有書契以
至於今日文章不知幾千變胸中一一罷縱橫平生
奇兀有如此但見鸞斯瑣瑣蓬蒿之下空爭衡有策

扶王伯無意謁公卿一官不自礙掉臂乘風行不作
高彈起絕調盃酒吟弄真意與垂雲之翼且少斂凝
目停視天爲青遇我亦是希有鳥聳身洗吭爲我鳴
乃相與遊汗漫登寥廓飲沆瀣鼓籥橐以樂此無涯
之樂一塵一介復何有眼底滄波長不涸

愛日

光陰不可畱春風還秋霜安得桑榆景長住椿萱堂
一寸光陰一寸心三公富貴年來忘

送司訓王宗正

乃祖亦以司訓
歷陞京兆尹

京兆有青氈君今復攜去拂之坐講堂輝映杏花樹

杏花樹下春風早一絃一誦春日好高歌孔顏舒懷
抱風塵富貴何足道莫謂青氎長伴一寒儒京兆舊
有飛騰衢

送雷州推官趙受夫

燈前風雨蕭蕭急明朝梅嶺行不得山城無物可畱
君風雨爲我阻行色湖海交遊有幾人百年聚散無
定辰當此相逢容易別一時拋擲皆青春南雄太守
餘俸錢樽有酒今豆有羶願君少停北去鞭欲別不
別情畱連情畱連苦欲住匹馬單舸道路長孤雲落
日相思處

繡衣行贈梁侍御

繡衣何絢燦繡出天女手中蹲獨角豸雄氣食天狗
紫宸依日月丹霞點星斗天帝不肯輕賜人天庭還
寵執法臣梁君自是天庭秀一官初拜繡衣新雙鳧
寫下江山麗四馬橋邊桃李春却向高堂拜慈母繡
衣且作斑衣舞膝下畱連萊子年眼前爛熳萱花午
出門萬里風霜清高騎驄馬金陵城雲霄見儀羽兒
童知姓名綠楊細雨烏臺夕官燭蕭蕭照顏色草成
彈疏上吾皇四海聞聲生霹靂禮闈放榜昔相見瓊
玉丰姿鐵作面今朝氣象果不虛梅關遠候張網車

崔嵬事業轉眼餘老夫屬望今何如

歌嫦娥

月中有叢桂白兔守其株搗就千年藥可以醫凡軀
嫦娥吞之骨飛動萬里雲霄踏丹鳳奔入月宮長不
老玉容長對青光好月宮夜夜霓裳歌塵心未絕今
如何

疊浪山

長風吹海浪海浪百層蹙浪勢高接天層層疊飛綠
紫鰲負之海上海游赤日煮海海不流紫鰲骨立凝作
山海鬼舞兮海若愁昆吾之劍可切石割取一片贈

與好事者陸地波濤湧盈尺

題蘭竹圖

竹有實蘭有花比若人情無涯裁冠紉珮不能遠採
之欲上青山巘清風明月期再來喜君屋壁畫圖開
守官滄洲苦相憶相逢顏色秋初日

爲邵伯衡題字說圖

君不見雲閒之鳳鳥引子高飛日初曉又不見庭前
竹明春長竹過舊族南峰有子賢俊姿錦繡羽翼琅
玕枝道以禮樂涵以詩書因名說字方矩圓規如嶰
谷風雲之會如淇園雨露之滋揚輝發秀轉眼時丹

青豈但眩人目頭角還看殊且奇鳳兮竹兮汝德之
儀學而不息兮汝德之姿

題蘭圖

蘭比言言有味蘭爲室室可邇託根空谷幽且香猗
蘭一曲吟鳳凰江風雪月音琅琅清魂飄落君子堂
丹青譜之生輝光怡我君子情何長

新州爲徽人題

仲尼東西南北之人閭里豈得拘此身君遊錢塘隨
結屋柳橋梅塢相與鄰芳草萋萋今王孫不歸今幾
春浩蕩江湖丈夫事大風歌罷情偏真烟雲渺渺指

點新州之畫圖幾度桃花憶所親

過諸鐵梅宅醉中信筆

鐵梅先生住南野山光滿貯書屋下庭前獨立禿柳
株有客訪之堪繫馬我來正值春日濃白雲出沒天
際峰平田萬頃新水色細路九曲閒花叢酒杯鳥影
橫晴空池魚吹浪搖簾櫳銀髯錯落老大雅疑是當
年舊臥龍當年臥龍識者誰時乎時乎終栖遲英風
吐作雄渾詞垂眉抱膝空守雌君不見濟南伏生元
十餘天子傳來古尚書

贈鐵梅

鬚眉如雪顏如霞胸中五色繡蟠花事不當言默不
語神遊八極回雲車一杯且醉諸夫子乃是詩壇舊
知己請題今日桃李詞青山墮落硯池水硯池水幾
千尺大筆濡之元氣溼不獨花鳥動深愁筆陣詞峰
鬼神泣

亭上醉同諸鄭二公賦

竹裏笑聲人不聞塵衢咫尺隔蒼雲青山日落不知
晚一樽酒盡未成醺未成醺更須飲桃花倚竹爛如
錦緣知春色片時濃臥就桃花展衾枕夢中恐作雲
雨疑且令侍兒歌我詩我詩龍吟鳳凰池飄音飛度

扶桑枝何當一醒視白日長與二公笑語傾襟期

題春海圖壽汪子卿父

我聞海上之蓬萊仙人遍種桃花樹春風吹花花盡
開紅雲紫霧迷沒不知處秦皇漢武竭盡百萬蒼生
力立望波濤空歎息神人不到雲裏宮方士徒鞭海
邊石自非氣骨孕不凡此地終是神仙山南極老人
致書詢西崑玉女鳴珮還嗟嗟此地無歲年歲歲長
見桃花妍龍宮窈窕煖浴日鶴橋參差高倚天東南
有一長髯之翁曾得壺公蒼竹杖拄之平步波濤上
瓊宇飄飄蓮葉舟銀河渺渺桃花浪收拾無限春貯

之方寸裏太極涵動靜元氣無終始煉作九轉丹呼
吸存變理青松臺閣萬重峰綠柳門牆一溪水我羨
畫此圖者筆力雄且神水墨一洗人間塵繁華不數
金谷富康寧求樂玉樓春玉樓春無盡時蓬萊桃花
開未歇玉樓歌舞度期頤

題壽圖

閨風臺方壺水相去幾萬里乾輪坤軸旋轉莫知其
底止極日月之出入元氣之終始蒼虬騰而逆鱗黃
鵠舉而弱羽滄波浩渺浴鳥川青峰兀突回龍柱獨
有廣成君飄飄駕片雲手握三才極身被七星文吞

沆瀣吐網緼朝東暮西超塵氛赴海屋之壽宴脯麟
炮鳳玉爲饌燭明星日珊瑚株籌添歲月蓬萊殿壺
公杖織女車太乙真人泛蓮葉武陵漁父迷桃花

小赤壁

萬炬乘東風烈焰走江虹雷電焚山石烟燦漬石紅
火龍捲飛石偶落茲庭中沙穿復冰齧火痕猶玲瓏
鯨鯢骨立瘦琥珀胎已空草廡自是好事者護以名
花轉瀟洒石靈長疑苦戰秋顛風驟雨鋒鏑下我今
弔以清平詞花枝日日多妍姿周郎曹老不足問洞
簫一曲長相思

夢椿

君家有崔嵬。歷落之古椿。以八千歲爲秋。以八千歲
爲春。靈物終變化。天壤留其神。其神何所託。乃在根
株親。至誠起。什木夢寐形影真。芳菲如接星露夕。蕭
颯難爲風雨辰。清蔭下覆厚如屋。綵衣舞罷歌復哭。
下有麒麟遊。上有鳳凰宿。秀分竇桂幾枝青。瑞比王
槐滿庭綠。百年歌舞夢寐中。夢耶寐耶已成空。縱有
好手畫未得。縱有好調彈未工。蓼莪讀罷枯柏死。君
家古椿生夢裏。茅屋雞聲燈火寒。涕淚流連讀莊子。

題漁人四景圖

春

漁人樂。春江上。桃花潭水深十丈。微風吹起鴨綠波。
波裏鴛鴦並遊蕩。鰕魚正肥意頗欣。橫笛一曲隔江
聞。飄音杳杳去不斷。脈脈春江低度雲。

夏

漁人樂。楊柳邊。短篷斜榻聚漁船。炎日如焚照不到。
瓦盆白酒蓮花泉。遙見西江點雲黑。江風獵獵江雨
急。醉中且和滄浪歌。笑指檣頭舊蓑笠。

秋

漁人樂。秋江水。夕陽紅射蘆花底。市頭鰕菜了官租。

餘博村酷喜相聚。蓬頭老妻勸滿觴。且云瓶中有儲糧。阿男打網北蕩去。有魚持歸堪作羹。

冬

漁人樂。江上雪。搖漾寒潭如浸月。老鯨驚吼衆魚跳。舉罾得魚罾竿折。侵晨提魚向村家。換得斗米用已奢。飽餐高臥日色薄。移船就看野梅花。

澗松吟

嗟嗟兮石礪松。下有泉齧曲屈之危根。上有雲封鬱秀之茂叢。泉兮音玲瓏。雲兮色青葱。於是乎叅蒼亢而招遊鶴。抱白石而蟠臥龍。嗟嗟兮石礪松。磊砢不

死天地未終

壽陳封君

桃源迷沒不知處。神仙有境何渺茫。姚江北走不百里。異境復有游源鄉。赤霞爲城白雲爲塹。遠而望之鬱以蒼。中廓曼如雜植桑麻。春雲魚龍忽變化。白日雞犬能飛翔。太丘翁年六十鬚眉錯落。眼方碧。清心一卷秋水經。煉骨九轉丹砂術。笑指庭桂而言曰。猗歟茂哉。謝蘭之馨。王槐之碩。登薦明堂。見採匠石。豈非吾翁栽培之力。於是壽鍾其身。福集其家。麒麟走而爲御。鳳凰吐而成花。予也安得與茲翁乘方明之

車行廣漠之野鼓太乙之楫泛浩蕩之涯

四皓

商山白石爛如雪中有紫芝花燁燁採而食之丰骨
清白日羽化鴻飛冥自謂風塵不入眼五侯事業意
何嬾圯橋孺子道者流招邀四皓如朋儔君不見草
廬三顧屈英主雲雷歛忽臥龍起

壽邵菊莊翁

先生本是有道者質任自然不外假正言侃侃激浮
流古意悠悠存大雅故家舊物是遺書有兒能讀業
有餘家藏星斗雙龍劍門侯風雲四馬車人兒聲名

播四海隨處政碑何磊磊小兒飛騰毛骨奇萬仞霜
風竦而待先生本是騎鹿仙東瀛西閩■顧前衣裳
天錫鷺鷥錦綸綉明揚鸞鳳箋家園雅集稱九老春
光長對青山好曳玉圍金半落英垂白含丹比商皓
時起舞飄飄雨扇動微颺懷元吐粹清虛府時起歌
醉中自按南山曲愉愉翁翁填篋和

石壁爲施一清題

先生結屋石壁下細蔓長藤復纏挂烟雲缺薄竹陰
補清氣蕭森雨過乍壁下石池一尺深海思江情同
變化春雷未起霹靂聲蛟龍縮角傍人詫君不見清

秋夜玩牛斗閒時有靈光遠騰射

西溟

西溟之源莫知其所始廻波直浸崑崙趾瑤華照耀
日月飛若木撼動風雲起霹靂一聲江海移西溟作
君臺下池岸芷汀蘭望不極沙鷗野鶴情相宜

楊翁夫婦齊壽

憶昔我醉楊翁宅偉哉楊翁能好客爛熳春暉再洗
樽畱連豪興先投轄烹肥炙鮮秩初筵中饋乃知阿
母賢門停騶從爲兒喜青藜白飯相周旋別來佳話
又幾年阿翁阿母齊壽仙歲華長住東風裏壽域新

開北海邊君不見走五都兮離別苦權勢傾兮家爲
口獨羨楊翁夫與妻碧梧鸞鳳相並棲攜手同行問
農事笑顏對坐試孫啼曾向君平卜消息笑指雙星
天漢低

存耕

君不見附郭幾畝汙邪田十金一畝阡陌連塵海波
濤易翻覆百年主者九變遷若有翁兮一片心平若
田兮保若金仁義之利萬倍獲耨欲易兮耕欲深呼
子付之子又子傳家世業無若此青氈尚不墮僞風
丁寧此田宜守死詩書六藝是鎡基友朋麗澤是霖

雨易耨深耕雞鳴起五谷有種護其美


賓竹

我有嘉賓抱此高節抗絕浮塵濯以冰雪臨我南軒
我接之相與揖讓乎清風徘徊乎明月一曲鳳凰吟
唱和兩清越從此未謝俗車轍

高臺山人爲余御史題

高臺山不可攀玉柱萬丈拄天關高臺山人稟其氣
讀書山下養高致此氣流行噓作春桃花萬樹錢塘
濱霜風颯颯轉秋令豸服生輝鐵冠正君不見高臺
山傍鷹振羽豺狼滅跡孤不語

愛桂挽詞

年年桂花下載歌還載舞今年桂花開去來成今古
清風明月憶是君回首青山一片雲無人伴舞婆娑
影  樹吟魂聲不聞

椿萱並秀圖爲江大尹歌

江公自是純孝裔行春駐節姚江水板輿具慶迎養
榮平反日報高堂喜奉翫椿萱並茂之畫圖坐見扶
桑幾度榮與枯椿樹叅天靄雲霧萱花繡地明珊瑚
文章蚤起天庭鳳德政先巢御史烏王事旣靡鹽復
遑將父母鳴琴有清閒還作綵衣舞綵衣舞綵衣歌

椿萱堂下開綺羅燕山五桂靈分秀蓬島三花瑞共
科栽培重荷天之力日月照耀雨露沾濡九重之恩
浩無極椿兮萱兮長保艷陽不凋之顏色

戲答禽言二首

姑惡

木槭槭兮石确确行人倦兮山日落怨魂化作春鳥
啼却向行人訴姑惡姑惡姑惡催婦織作早夜鞭撻
慮婦家薄

爹歸未

父子有至性禽鳥與人同一朝相遠去子心何忡忡

早夜望爹歸乃在啼聲中爹歸當有期在家作闍公
不如不歸相憶無終窮

題海鶴圖

鶴兮本是鳥中之神仙徂徠飛下不知是何年吞珠
珊瑚窟啄玉崑崙巔下視九土雲泥連爭巢蓬蒿聚
燕雀濺血林藪雄鷹鷗海上崔嵬一片石上有黃鵠
弱翅之剛風下有蒼龍縮角之重淵雙立破鴻濛如
在開闢先君家圖書裏形影猶宛然乘軒侯國不足
貴伴琴太守今誰賢日高三丈君睡醒對我泛泛蓮
花船鳴聲嘹唳舞蹁躑元氣鼓動天轉旋林逋長伴

探梅月魏野未動烹茶烟羽衣道士遊赤壁一夢初
破非虛傳

迎瑞樓爲蕭山來氏題

迎瑞樓前粉垣立水墨慘淡烟雲溼扶桑弄影曙色
開眼前塵境恍然失丹霞歛動毛羽揮紫霧分開頭
角出岸側崖頽縹緲閒萬里江光殊咫尺中有神魚
拔浪飛桃花滾滾水流急門庭進瑞應無已君家種
德何代始瑞在德兮不在他畫師之意豈虛擬君不
見竇桂王槐秀似雲二家世澤昭國史

次東溪先生韻

屈子日憤楚國窳騷經分別草與花稚松實忌絲蘿
掩香芷未免菰蒲遮竹兮菊兮君子儔陶巾玉駕今
誰家蓋自生民日用來稻黍稷麥并桑麻二物頗爲
清者愛去此取彼毋乃差抑爲城中土似金兼收並
育言徒誇但得有菊秀成畝秋食其英春食芽遠引
細泉繞白石淺剷瘠土加烏沙此中亦可度年歲牆
陰屋影妨清華片雲片月吾適意一草一木詩生葩
先生謂味難兼得厥魚雖美熊掌加君不見虎豹與
龍蛇但使遠去無哈呀孔聖獵較意廣大眼前不
犯與豸菊可保兮竹可惜地不是容生紛挐先生聞

之亦大笑胸中造化原無涯

題畫

山中無戰爭日試戰爭圖
虎龍相倚搏風霆可招呼
恐君撩動英雄心我有一曲梅花吟
霜空高曠無著處脉脉溪雲流月陰

正峰

湖上正峰其高幾尋主人對之以正其心
雲霞光儀青空表捲簾端坐發清吟
天晴好景開圖畫日暮佳音形
瑟琴仙女側挂玉梳小丈人倒捧香爐陰
嗟嗟止峰大賓如見上帝爾臨

